

ihren Gott warlich lieben vnd ehren.
Bedencket wie vnser Vatter Abraham
auch versucht sey worden/ vnd durch vil
Trübsal bewärt/ vnd ein Freund Gottes
erfunden ist. Desgleichen auch Isaac
vnd Jacob/ also auch Moys: Ja alle
die/ so Gott je gefallen/ seind durch vil
Trübsal bewärt hindurch ganzen/ vnd
getrew erfunden worden. Iudith. Cap.
8. Verſ. 20. 22. 23.

Was wöhren wir vns dann lang? sie
seind alle diesen Weeg hindurch gangen/
Alle/ Alle/ Alle/ die Gott jemalen gefal-
len haben. Es ist niemand für bewärt
vnd getrew zuhalten/ der diß Zeichen
der Trübsal vnd Gedult nicht hat.

Der N. Iudith Wort steht vnd bleibt un-
versehrt fest vnd war: Alle die/ so Gott je ge-
fallen/ seind durch vil Trübsal bewärt hin-
durch gangen. Vnd diß heist/ von Christi we-
gen leiden; diß heist/ mit Christo vberwinden.
Diß ist die rechte Landtstrass gen Himmel/ sie
ist zwar schrofig/ rauch vnd eng / sie ist aber
gang sicher. So wöllen wir vns nun ein klei-
nes gedulden. Streiten wir nur dapffer/
dem Fechter wird die Hilff/ vnd dem Ob-
siger die Belohnung nit außblei-
ben. Das ist so gewiß als

A M E N.

✠:(IHS):(✠)